

Adare qu'abem à segui l'Arrazas ; nou y a mey que ère qui pod amucha-s lou cami. Que cour aci toute doucète sus u chicoy plané e que s'amuche tant engadyante de que-s gahe embéye de bagna-s'y u drinot. Mes hòu ! qu'a resou lou qui dits « à l'aygue douce nou-b hidet ? » Qu'ère tant réde de que glaçabe lou co e qu'aboum lèu heyt de ha u saut ta tira-s d'aquet glas. Y'abouy à bouta-m au sourelh sus ue roque coum la sargalhe grise eñta escalouri-m !

Au pè de las « Gradas de Soaso » que s'estanguèm bères pauses estranglades per lous sauts esmiraglants de l'Arrazas sus las roques beroy coupades en escalès de gran payère. Qu'en countey 27 talhats coum si û cisèu mayic abè tribalhat aqui tau soul plasé dous oelhs. Dus carabinieri qui s'en anaben pourta quauque messadye au soum de Gaulis que ralentin aymablamen la marche ta ayuda-s en aquet machant passadye. Brique, gracis au Cèu, n'aboum besougn ayude, mes la coumpagnie que-ns agradabe... Toutu nou poudèm destaca-s lous oelhs d'aquères Gradas escumouses oum lou sourelh e lusibe de touts lous hoecs de mieydie !

Lou cerc de Soaso, clabat per mountagnes desoulades qui plouren lou malur de-s béde coundanades au sequè eternau que-soun aboundouses de yerbe fine oum créchen las bergounouses « flores de niève ». Lous carabinieri qui saben mielhe que nous auts desnida las flourines blanques que s'en coelhoun sengles flouquets. A l'ue ore dou brespau, qu'èrem à la « Cola de Caballo ». En bertat, aquets aragounés que saben hère pla noumenta las causes ! Aquère cascade que hè tout à feyt pensa à la coude d'û chibau que lou bent esparpalle. Aqui que tiram, dab ahides, las mascadures dou peyròu empermou qu'abem bet drin las dents agusades per la hami apuch d'ue camade parièrre. La daune de la « case de Viu » que-ns abè tout boutat dab abounde. L'aygue frésque de la chourrère, per aquet cop, qu'anabe remplaça lou « Carriño » qui abèm lechat par las planes... Lous noustes coumpagnous que hen coum nous auts e que fenin per se partadya coum frays nabèts tout ço qui sourti de las biasses e dou peyròu, e en seguide que cantèm u drinot, coum toustem...